

R B985 DEB

MAHATHIR - JAMBATAN

PULAU PINANG, 3 OGOS (BERNAMA) -- JAMBATAN PULAU PINANG, YANG BARU SIAP DIBINA, DAN KERETA NASIONAL MALAYSIA +PROTON SAGA+, YANG BARU DILANCARKAN, HARI INI MENCATATKAN SEJARAH BERSAMA APABILA PERDANA MENTERI MEMANDU KERETA ITU MELALUI JAMBATAN TERSEBUT.

DATUK SERI DR. MAHATHIR MOHAMAD MERUPAKAN PEMIMPIN KERAJAAN PUSAT YANG PERTAMA SECARA RASMI MEMANDU KERETA KELUARAN SULUNG PERBADANAN PERUSAHAAN BERAT MALAYSIA (HICOM) ITU MELALUI JAMBATAN YANG KETIGA TERPANJANG DI DUNIA, YANG SIAP DIBINA KIRA-KIRA DUA MINGGU LALU.

TURUT +MENUMPANGI+ KERETA PROTON SAGA 1.3S BERWARNA MERAH YANG DIPANDU OLEH PERDANA MENTERI IALAH ISTERINYA, DATUK SERI DATIN PADUKA DR. SITI HASMAH, MENTERI KERJA RAYA, DATUK S. SAMY VELLU, KETUA MENTERI PULAU PINANG, DR. LIM CHONG EU DAN PRESIDEN HICOM, TAN SRI JAMIL JAN.

DATUK SERI DR. MAHATHIR MULA MEMANDU KERETA TERSEBUT DARI PERMULAAN JAMBATAN ITU DI JALAN UDINI PADA KIRA-KIRA PUKUL 8.30 PAGI DAN TIBA DI BAHAGIAN TENGAH JAMBATAN YANG TERLETAK 5 KM DARI SITU, 10 MINIT KEMUDIAN.

BELIAU KEMUDIAN MENINJAU KEADAAN DI SEKITAR MENARA TENGAH JAMBATAN ITU DAN DI SITU BELIAU DIBERI TAKLIMAT MENGENAINYA OLEH DATUK SAMY VELLU. -- LAGI
1228MST 03 08 85

MAHATHIR - JAMBATAN 2 PULAU PINANG

SEBELUM ITU, KETIBAAN PERDANA MENTERI DAN ISTERINYA DISAMBUT OLEH KETUA PENGARAH LEMBAGA LEBUHRAYA MALAYSIA (LLM), DATUK HAJI MUSTAFFA AHMAD, ANGGOTA-ANGGOTA LEMBAGA PENGARAH LLM DAN PARA PEGAWAI KANAN SYARIKAT HYUNDAI CONSTRUCTION AND ENGINEERING (KOREA), YANG MEMBINA JAMBATAN ITU.

JAMBATAN PULAU PINANG, YANG MENGHUBUNGI PULAU ITU DENGAN TANAH BESAR, MENELAN BELANJA \$850 JUTA DAN AKAN DIBUKA KEPADA UMUM SECARA RASMI OLEH YANG DIPERTUA NEGERI PULAU PINANG, TUN DR. HAJI AWANG HASSAN PADA 15 SEPT. INI.

DATUK SAMY VELLU KEMUDIAN MENYAMPAIKAN CENDERAMATA BERUPA PEWTER YANG DILAKARKAN DENGAN LUKISAN JAMBATAN ITU KEPADA DATUK SERI DR. MAHATHIR DAN DR. LIM CHONG EU.

ISTERI PERDANA MENTERI KEMUDIAN MEMANDU KERETA YANG SAMA DI SAMPING DATUK SERI DR. MAHATHIR, DARI TENGAH-TENGAH JAMBATAN ITU KE SEBERANG JAYA YANG TERLETAK DI TANAH BESAR, KIRA-KIRA 8.5KM DARI SITU.

TURUT MENGIRINGI PERDANA MENTERI DAN ISTERINYA IALAH MENTERI PELAJARAN, DATUK ABDULLAH HAJI AHMAD BADAWI, MENTERI PERTANIAN, ENCIK ANWAR IBRAHIM, TIMBALAN MENTERI KERJA RAYA, DATUK HAJI ZAINAL ABIDIN ZIN DAN PARA ANGGOTA EXCO KERAJAAN NEGERI.

DATUK SERI DR. MAHATHIR DAN DATUK PADUKA DATIN SERI DR. SITI HASMAH ADALAH DALAM RANGKA LAWATAN RASMI SELAMA DUA HARI KE NEGERI INI MULAI SEMALAM. -- BERNAMA
1242MST 03 08 85